

Reykjavík 8. júní 2020

Efni: Umsögn um breytingar á aðalskipulagi Kópavogs og aðalskipulagi Reykjavíkur

Hundaræktarfélag Íslands hvetur Samtök sveitarfélaga á höfuðborgarsvæðinu að hafa hagsmuni hundaeigenda í huga við breytingar á aðalskipulagi Kópavogsbæjar og Reykjavíkurborgar varðandi staðsetningu legu 1. lotu Borgarlínu.

Markaðs- og miðlarannsóknir ehf. (MMR) gerðu könnun 18.-22. október 2018 um gæludýrahald höfuðborgarbúa og samkvæmt þeirri könnun héldu um 24% heimila í borginni hund. Úrtakið var ekki mjög stórt en 964 svöruðu könnuninni. Miðað við þá fjölgun, sem hefur orðið á skráningum hunda í Hundaræktarfélagi Íslands undanfarin ár, má gera ráð fyrir að þetta sé varfarin áætlun.

Hundaeign íbúa á höfuðborgarsvæðinu eykst með hverju ári. Í dag er talið að að minnsta kosti fjórðungur íbúa haldi hund og mikilvægt að hafa þennan stóra hóp í huga þegar hvers kyns skipulagsbreytingar eru í bígerð. Einnig ber að athuga að þessi hópur þarf að komast leiða sinna enda margir sem velja grænan (bíllausan) lífsstíl og þar af leiðandi er mikilvægt að hundasvæði og hvers kyns útivistarsvæði séu skoðuð í samhengi við skipulag um borgarlínu. Vert er að benda á það að hundar hafa verið velkomnir í almenningsvagna Strætó síðan í mars 2018. Verkefnið hefur tekist afar vel og hundar og eigendur til fyrirmyndar.

Samvæmt því skipulagi sem nú er til kynningar liggur borgarlínan þvert yfir Geirsnef sem er eitt af þremur svæðum sem skilgreint er sem lausagöngusvæði hunda innan borgarmarkanna (hin eru Geldínganes og Hólmsheiði). Staðsetningar Geldínganes og Hólmsheiðar krefjast þess í raun að hundaeigandi, sem vill veita hundi sínum það eðlilega og nauðsynlega líf að fá að hlaupa frjáls, hafi til umráða bíl og keyri þangað. Í borginni eru fjögur hundagerði; við BSÍ, í Laugardalnum, í Grafarvogi og í Breiðholti. Gerðin eru smá og ekkert þar sem gæti örvað hunda - einungis gras. Þegar kosið var um verðug verkefni í Vesturbæ Reykjavíkur var stórt hundagerði við Vesturbæjarlaug kosið sem verkefni sem stóð til að framkvæma, en nú er búið að minnka svæðið niður í 400 fm og nokkuð ljóst að það svæði nægir ekki meðalstórum hundi til útivistar.

Frá því að hægt var að sækja um undanþágu til hundahalds í Reykjavík hafa hundaeigendur þurft að greiða sérstakan skatt til borgarinnar, svokallað hundaleyfisgjald. Félagið krefst þess að þessir fjármunir verði nýttir í þágu hunda og hundaeigenda í borginni, til dæmis viðunandi græn svæði fyrir okkur. Horfa mætti til Danmerkur þar sem stór skógarsvæði hafa verið kyrfilega afgirt og merkt sem svæði til lausagöngu hunda.

Hundaræktarfélag Íslands tekur heilshugar undir sjónarmið Félags ábyrgra hundaeigenda í umsögn þeirra varðandi málið sem send var inn í samráðsgáttina 8. maí sl. Eins og fram hefur komið er afar mikilvægt að hundaeigendur, líkt og aðrir, geti tileinkað sér grænan lífsstíl með besta vininn með í för. Eins er brýnt að hundaeigendum sé gefinn kostur á því að uppfylla lög um aðbúnað hunda með því að geta gefið þeim þá hreyfingu og örvun sem þeir þurfa, án þess að þurfa að aka langar vegalengdir til þess. Þó viljum við leggja áherslu á mikilvægi þess að Geldinganes og Hólmsheiði verði áfram möguleiki til lausagöngu hunda, enda þarfir hundaeigenda og hunda mismunandi. Félagið vonar að umsögn þessi verði tekin til greina við skipulagningu Borgarlínunnar og grænna svæða innan borgarinnar almennt

Með vinsemd og virðingu,
f.h. stjórnar Hundaræktarfélags Íslands,

Auður Sif Sigurgeirsdóttir, varaformaður og Guðbjörg Guðmundsdóttir, varastjórnarmaður.



F.C.I.
Fédération Cynologique
Internationale



N.K.U.
Nordisk
Kennel Union

Síðumúla 15
108 Reykjavík
Iceland

Sími / Tel. +354 588 5255
Fax +354 588 5269

hrfi@hrfi.is
www.hrfi.is